

آخ لو كانت ولد

رجب أبو سرية

( رجب الطيب )



### المشهد الاول

(يدخل حسن إلى البيت فرحاً يحمل بيده شهادته المدرسية)  
ينادي ياما: ياما.. ياما  
(تدخل أم حسن إلى المسرح وتشمر عن يديها كأنها كانت تجلي في المطبخ)  
الأم: شو في ياماه؟  
حسن: نجحت ياماه.  
الأم: مبروك ياماه ألف مبروك الله يفرح قلبك زي ما فرحتني  
(وتطلق زغرودته)  
الابن: بس عشان تعرفي ابنك.  
الأم: الله يرفع راسك زي ما رفعت راسي، خليني أكيد العدا.  
حسن: أبوي لسة ما روح من الشغل بدي أبشره.  
الأم: أبوك لسة شوي وبيجي.  
حسن: خليني أحكي معه على الجوال.  
(ويقوم وينزع الجوال عن وسطه)  
حسن: بابا مرحباً، أبو حسن، خدك هال الخبر الحلو أنا نجحت بابا.. طيب بتجيب معك الحلوان الهدية إلي  
وعدتني فيه..  
(تغادر الأم المطبخ فيما الولد ينتنطط، ويضع المسجلة أغنية: وحياتة قلبي وأفراحه ويدندن مع الأغنية.)  
تدخل يارا: مرحباً حسون، يا سلام عليك شو مزوق أنت عرفت إني نجحت حاططي هالأغنية الحلوة.  
حسن: شو يعني هادي الأغني إلي أنا إلي نجحت.  
يارا: أنا كمان نجحت وطلعتها الأولى.  
حسن: وشو يعني ما أنت بتطلعي كل سنة الأولى، بس أنا نجحت هالمره من غير ما أقصر في ولا مادة.  
يارا: يا سلام عليك، لا والله شاطر، بسلامة الدروس الخصوصية.  
حسن: بلا طولة لسان ها، هادا بدل ما تفرحيلي وتغنيلي كمان.  
يارا: أغنيك؟ وينها ماما..  
وتنادي: ماما.. ماما.  
تحضر الأم: يارا شفتي يا حبيبتي أخوك نجح في المدرسة.  
يارا: وأنا كمان يا ماما نجحت وطلعت الأولى.  
الأم: مبروك يا بنتي (بفتور أقل).  
يارا: بابا بعدو ما رجع من الشغل، بدي أبشره.  
الأم: أخوك بشره وحكى معه على الجوال وراح يجيب الحلوان.  
يارا: وأنا يا ماما بدي أبشره.  
الأم: لما يجي يا ماما.. لما يجي.

وتغادر إلى المطبخ.  
يارا: حسن أعطيني جوالك، خلىني أحكي مع بابا وأبشره أني طلعت الأولى.  
حسن: تبشيره، ما أنا خلص حكيت معه.. وبعدين الجوال ما في كرت.  
يارا: الله يخليك يا حسن.  
حسن: خلص خلص مش ماما حكتلك لما يجي بيعرف.. يارا.. يارا.. شو بدك تجيبيلي هدية في عيد ميلادي.  
يارا: انت شو بدك تجيبيلي.. ما أنا عيد ميلادي قبل عيد ميلادك.  
حسن: أنا أجيبلك.. أه انت شو في نفسك؟  
يارا: إلي بطلع منك.  
حسن: إلي بطلع مني! ولا اشني (يضحك)  
يارا: انت تجيبيلي مسجل بسماعات على الدان زي إلي معك.  
حسن: بعطيك اياها وأنا بحبيب وحده إلي.

(يدخل الأب ومعه أشياء مغلفة، حسن يركض إليه)  
يحضنه الأب ويقول: مبروك يا ابني، والله مبسوط فيك كثير، أه هيك بدي إياك، دايمًا ناجح شد حيك يا بطل.  
يارا: وأنا يا بابا بابا.  
الأب: يارا.. أه وانت شو صار معك؟  
يارا: طلعت الأولى.  
الأب: ممتاز كثير.. يعني زي كل سنة.  
يارا: وأخذت تفوق.  
الأب (في نفسه): والله كان نفسي انت تكوني حسن، وهو يكون يارا.  
يارا: شو قلت يا بابا.  
الأب: لا أبدًا ولا اشني.  
حسن: وين رحتو.. وين الحلوان يا بابا.  
الأب: هيبها قدامك يا الله افتحها وورينا يا بطل.  
حسن: ياما.. ياما تعالي، أوبيا اجا وجاب الحلوان معه.  
(ويتناول المغلف ويفتحه)  
(ثم يذهب لأبيه يعزم عليه، يأخذ الأب ويتناول حبة الشوكولاته ويأكلها وتدخل الأم، يعزم عليها، تفعل الشيء ذاته، ثم إلى يارا.. ويضع المغلف جانباً.)  
(يارا تذهب وتتناول باكيت الحلوى وتعزم على الأب، ويتناول قطعة ويضعها في جيبه) ويقول: مبروك علينا يا أولاد والله فرحتونا (وتعزم على الأم وعلى حسن).  
حسن: وهديتي يابا إلي وعدتني فيها، وينها.  
الأب: وهادي شو هي وبشير إلى المغلف الآخر (يركض إليه حسن ويفتحه ويقول):  
حسن: يا سلام عليك يا أحلا أبو في الدنيا، البيانو إلي وصيتك عليه.  
يارا: وأنا يابا.  
الأب (بارتباك): ليش ما خبرتوني انو يارا كمان طلعت الأولى، على العموم ولا نزعلي، بكرة بجيبلك الموسوعة العلمية اللي وعدتلك فيها.  
يارا: بس أنا يابا!!  
يقاطعها: خلص قلتلك بكرة.. يعني بكرة.  
ينتهي المشهد.

## المشهد الثاني

(يارا تجلس على جهاز الكمبيوتر وترتدي النظارات، تدخل عليها الأم.)  
الأم: ايش يارا طول انهارك قاعدة على الجهاز يعني ما بدك تساعدني في شغل البيت.  
يارا: والله ياما زهقت من قعدة البيت، حتى في العطلة ما في عطلة، كمان بدي أشتغل في البيت.  
الأم: يعني وين بدنا نروح يا بنيتي؟ وبعدين ليش ما تساعدني في شغل البيت مش لازم نتعلمي.  
يارا: أتعلم الطبخ والكنيس والغسيل ياما؟  
الأم: أه، لازم يا بنيتي، مش مصيرك تنجوزي وتشتغلي في البيت؟ مين بكرة بدو يطبخك ويكنسلك ويغسلك؟  
يارا: ايش معنى حسن، طول نهاره بره، بطلع مع أصحابه، بيتمشو بيروح النت، وبيروح مع أبوه على قرايينا، وما بيخلو مناسبة.

الأم: ما هو الولد زي أبوه والبنيت زي امها.  
 يارا: الولد مع أبوه لبره، والبنيت زي امها في البيت!!  
 الأم: هادا نصيبنا يا بنتي هيك تقسمت ياما.  
 يارا: بس الدنيا بتتطور ياما، والست اليوم بتشتغل زي الراجل.  
 الأم: لا ياما، الست ست والراجل راجل، الراجل بيشتغل وبيصرف على البيت والست بتطبخ وبتغسل وبتربي الأولاد.  
 يارا: والله هالعيشة بتزهق.  
 (يدخل حسن فرحاً ويسلم).  
 حسن: مرحباً، شو طبختي اليوم النا ياما، ما بدنا ندغدى أنا جعان.  
 الأم: استنتى يا ولد لما يجي أبوك الغدا بيكون جاهز (وتخرج للمطبخ).  
 يارا: حسن.. حسن.. تعال قلني وين كنت.  
 حسن: رحنت مع أصحابي لفينا شوي.. وبعدين رحنت عالنت.  
 يارا: نفسي والله مرت أجرب هالنت.  
 حسن: شو والله ناقص بس تصيري حسن صبي، وتيجي معي تفتحي التشاد وتحكي مع الناس.  
 يارا: انت بتحكي مع مين عالنت.  
 حسن: مع شباب وصبايا عرب وأجانب، وبنفتح على مواقع يا سلام يا يارا (بيبدو منشرحاً).  
 يارا: وأنا حقي ناقص يعني؟  
 حسن: آه.. حقا ناقص، ليش انت ولد؟ ما أحلاك والله وانت مصحباي شباب الله يعلم من وين هما.  
 يارا: طيب اشمعنا انت كل شي مسموح لك.  
 حسن: بدك تسكتي وتضبي لسانك، ولا بقول لأبويا لما يرجع.  
 يارا: شو بدك تقوله؟  
 حسن: بقوله بنتك بدها تروح ع انت تصاحب شباب.  
 يارا: طيب.. خلص.. وايش عملت كمان.  
 حسن: قصدك في الدورة.  
 يارا: آه الدورة.. الله بيدي الحلق للي ماله ودان.  
 حسن: ايش قصدك؟  
 يارا: أبداً، هيك صار لك شهرين بتتعلم موسيقى ايش سويت؟  
 حسن: صرت أعرف أعزف وتعلمت اغنية جديدة.  
 يارا: صحيح؟ كان نفسي أتعلم في الدورة زيك.  
 حسن: نعم، علشان نعمل ثنائي يعني، فور ولا فور كاتس.  
 يارا: طيب تعال، وريني شو تعلمت.  
 حسن: طيب بشرط.  
 يارا: شو هوي.  
 حسن: أنا بعزف وانت بتغني.  
 يارا: موافقة.  
 (يبدأ حسن بالعزف على الأغنية ويارا ترافقه في الغناء).

### المشهد الثالث

(يظهر الأب جالساً يراجع بعض أوراقه، تدخل عليه الزوجة بفنجان القهوة، تضعه أمامه وتهتم بالمغادرة.  
 الأب: استنتي يا أم حسن عايزك في شغلة.  
 الزوجة: شو في بابو حسن.  
 الزوج: هي العطلة خلصت والأولاد على وجه فتحة مدارس، سنة زمان والبنيت بتاخذ التوجيهي. والولد بعد سنتين زمان بيصير بدو يدخل على الجامعة.  
 الزوجة: صحيح، في ايش بتفكر؟  
 الزوج: البنيت شاطرة كثير واكيد بدها تاخذ مجموع كبير.  
 الزوج: بتفكر تودبها على الجامعة؟  
 الزوج: انت ايش رأيك؟  
 الزوجة: يا أبو حسن مانت عارف البنيت مسمية لابن عمها.  
 الزوج: آه.. شو يعني؟

الزوجة: بناخذ رأي دار أخوك.  
الزوج: معك حق، يعني ممكن البننت تتجوز وتكمل تعليمها إذا بدو جوزها وأهلها، وإذا ما بدهم يعني ايش لازمة الجامعة ما هي البننت مصيرها لدار زوجها.  
الزوجة: والولد.  
الزوج: حسن.. والله لو بدفع دم قلبي لعلمه أحسن تعليم.  
الزوجة: وإذا ما بدو.  
الزوج: شو.. ما بدو على كيفه يعني.  
الزوجة: طيب شو رأيك ناخذ رأيهم.  
الزوج: رأي مين؟  
الزوجة: الولد والبننت.  
الزوج: ما في مانع.  
(يدخل حسن..)  
الأب: ابن حلال يابا، تعال.  
حسن: طبعاً ما أنا ابنك كيف ما بدي أكون ابن حلال بالله.  
الأب: بدي تشد حيلك ضابلك سنتين وتخلص توجيهي وتشوف وين بدك تكمل تعليمك.  
حسن: انت شو رأيك يابا؟  
الأب: هادي ما فيها رأي بدك تكمل الجامعة وتسافر برة.  
حسن: وإذا ما جيت مجموع؟  
الأب: بوديك على أكرانيا تدرس طب ولا هندسة.  
حسن: طب.. هندسة.. أنا بدي أسافر على أمريكا أدرس موسيقى.  
الأب: ما في مانع المهم تجيب الشهادة.. أمريكا.. منيح كثير.  
الزوجة: والبننت.  
الزوج: ناديةها.  
الزوجة: يارا.. يارا.. تعالي ياما.  
(تدخل البننت ويبدو أنها كانت تمشط شعرها)  
الأب: والله كبرت يابا وصرت عروسة.  
(تخجل البننت)  
الزوجة: مش بعيد يجو دار عمها ويطلبوها رسمي.  
البننت: أنا بدي أكمل تعليمي يابا.  
الأب: ما في مانع بس انت تجيبي المجموع الكبير وبوديك على الاسلامية أو الأزهر.  
البننت: بس أنا بدي أدرس أوبرا.  
الأب: أبرا.. وين؟  
البننت: في ايطاليا.  
الأب: ايطاليا.. شو؟ انجنيت يا بنت؟  
البننت: ليش يابا ما أنا لسة سمعاكو بدكو تودوا حسن لأمريكا يدرس موسيقى.  
الأب: عال والله.. بدك تطلعي فنانة.. تغني.. يقولوا عنا عيلة نور.. تأديبي يا بنت.  
البننت: بس الأزهر والاسلامية ما فيها غير يا صحافة يا تجارة يا أدب عربي.  
الأب: وفي كمبيوتر كمان.. على العموم.. ما بنقدر نوديك برة.. يا دوب نتحمل نوديك الجامعة هان لازم تكوني قدام عنيانا.  
البننت: ما أنا يابا طول عمري بغني في المدرسة، وبشارك في كل المناسبات، والكل بيحب صوتي وبيقول عنه حلو، ومحتاجة دروس على أصول.  
الأب: الغناء.  
البننت: شو فيها؟  
الأب: ما في عادة، عمرك سمعتي بنت بتطلع تدرس برة من قرايينا ولا جيرانا، ولا أصحابنا.. وشو غنا كمان!!  
الزوجة: خلص يا جماعة استهدا بالله، وخلينا.

المشهد الرابع

أبو حسن يدخل وينادي زوجته.  
أم حسن.. يا أم حسن.

(تحضر على عجل): ما تواخدي ثواني والأكل بيكون جاهز.  
أبو حسن يجلس: لا تعالي هان بدي أحكي معك.  
أم حسن: خير ان شاء الله شو في.  
الزوج: اليوم حكي معي أخوي أبو خليل، وسألني عن يارا.  
الزوجة: وشو قتلته؟  
الزوج: ايش بدك اقول يعني.. البننت للولد ما في كلام.  
الزوجة: مثل ما بدك.  
الزوج: ماشي خليني أروح أبذل تيايبي.  
الزوجة: وأنا بكون خلصت، ثواني وبيكون الغداء جاهز.  
(يخرجان ويدخل حسن ويأرا).  
حسن: شو يارا؟ سمعت ان أبوي وعمي بيفكروا يقرأوا فاتحتك.  
يارا: فاتحتي على مين؟  
حسن: يعني مش عارفة على مين؟.. ابن عمك خليل. أه خليل انت عاجبتيه وبننت عمه، بينزلك عن ظهر الفرس.  
يارا: وانت ليش ما تتجوز بنت عمك سحر؟  
حسن: سحر ما بتعجبني.  
يارا: البننت بس لازم تعجب الشب علشان يتزوجها.  
حسن: أه.  
يارا: وهو لازم يعجبها كمان.  
حسن: لا وأنا أبوي بيقول لو بدك بنت الملك لأجوزك إياها.  
يارا: وأنا؟  
حسن: انت لابن عمك إذا بدو إياك.. يارا.. سمعت انه الك صاحبة حلوة كثير.  
يارا: مين هند؟  
حسن: حبيبي يارا.. عرفيني عليها.  
يارا: أعرفك عليها؟ ليش؟  
حسن: يمكن تعجبني وأقول لبابا يخطلي إياها.  
يارا: أعرفك عليها، انت عندك استعداد تعرفني على اصحابك؟  
حسن: ايش بتقولي، اعرفك على أصحابي.  
يارا: يعني بفكر شوي على طريقتك.  
حسن: ما تنسي ولا لحظة إنك بنت وأنا شاب.  
يارا: هادا الي مجنني، دائماً أنت شاب وانا بنت يا سيدي هادا اشي طبيعي، بس اللي مش طبيعي انه انت مسموكلك كل شيء، وأنا محرومة من كل شيء.. ليش يميزوا بيني وبينك.. أنا وانت اخوة من أب واحد وأم واحدة متربين سوا، وعايشين سوا، وفي عمر واحد تقريباً (يدخل الأب).  
(يدخل الأب، شو فيه يا أولاد، صوتكوا طالع).  
حسن: أبداً بابا بس كنت بأقول ليارا.. إنه.  
الأب: إنه شو؟  
حسن: إنه.. إنه.. ابن أخوك خليل..  
الأب (متقائل): أه.. انت على طول ما تبلت في تمك فولة.. يا سيدي على العموم اختصرت علي الطريق.. شوفي يارا.. زي ما انت عارفة بابا، من وانت صغيرة، وزي ما هي عادة الناس، انت مسمية لابن عمك، وعشان حق الناس علينا، ما نشرق ونغرب، ونقول جامعة ما جامعة، أنا لمحت لخوي أبو خليل وهو صرح لي إنهم بدهم إياك لخليل.  
يارا: بس أنا بابا بدي أكمل تعليمي.  
الأب: وماله، بنتناقش معهم في الموضوع.. ولا جوزك قصدي إلي بدو يصير جوزك مالو حق يحدد مستقبلك.  
يارا: مستقبلي أنا بحدده يابا.  
الأب: ماشي يا ستي بس ما بتحدديه لحالك.  
يارا: بنتشاوك معاك ومع امي ومع أخوي حسن.  
الأب: ومع خليل كمان.  
يارا: ليش خليل؟  
الأب: ما هو راح يصير زوجك ومسؤول عنك.  
يارا: لسة ما صار.  
الأب: بس بدهم يتقدمو الك رسمي.

يارا :ولما يتقدموا، أنا ما وافقت عليه.  
الأب (ينتهي صبره): شو يعني ما وافقت، يعني يمكن ما توافقني؟ لا..... هادي بيني وبين أخوي أبو خليل.. إذا اتفقنا خلص.. إذا أعطيت كلمة خلص.. انت موافقة.  
يارا: بس يابا..  
الأب: ايش فيه يا بنت.  
يارا: انت كيف تجوزت امي.  
الأب: شفتها عجبتني وتجوزتها صار النصيب.  
يارا: وهي لما شافتك عجبتها؟  
الأب: عجبتها؟ ايش قصدك؟ اسألها.. أنا اللي يعرفه إني خطبتها وأهلها وافقوا وصار النصيب.  
يارا: بس يابا أنا ما عندي مشاعر تجاه ابن عمي.  
الأب: مشاعر.. انت ايش بتقولي؟  
يارا: ما بحبه.  
يجن جنون الأب: مين قال انك لازم تحبيه.. والله لو فكرت تحبيه، حتى لو هو ابن عمك لحرمتك عليه. امشي من وجهي قبل ما ارتكب جريمة.. قال حب قال ..  
(تذهب يارا، وتقول لنفسها، والله لو غصبتوني على عمل واحد ما بحبو لموت نفسي)

ينتهي المشهد